

PEDRO REMBICUACHIA YIPINDAR VAHE SAN PEDRO

Pedro mahenduhasa Jesús reroyasar opacatu rupi oñemosai vahe upe

¹ Che, Pedro, Jesucristo apóstol aicuachía co che ñehe pëu, pe Tũpa rembiporavo pe recua pipe sui peñemosai vahe ivi Ponto, Galacia, Capadocia, Asia iyavei Bitinia rupi peico vahe upe.

² Supi eté pe yande Ru Tũpa rembiporavo yipisuipe peico semimbotar rupi. Evocoiyase oEspíritu Santo pipe pe peha oyeupe nara viroyasar pe reco ãgua 'imoatiropri toyuvirecoi che Rahir ruvi pipe oangaipagüer sui' oya. Peipisi catu Tũpa porovasasa pe reco tupri ãgua.

Tũpa suindar mbahe aviye vahe rãrosa

³ ¡Imboeteipri tasecoi Tũpa, yande Yar Jesucristo Ru! Ahe niha oporoparaisuerecosa pipe yande recocuer mbopiasu. Ëgüe ehi yandeu Guahir Jesucristo ocuerayevise. Ipípe sui yaicuaño ité oimera mbahe aviye vahe Tũpa suindar yandeu.

⁴ Ipípe sui avei Tũpa oipisi ucara pëu pe momba-hesa iyave yapocatupri nocañi vaherã, ndituyui vaherã iyavei ndopai vaherã ité.

⁵ Pe peyeroya ité Tũpa rese. Sese niha ahe opĩratasa pipe pe repi mbahe tẽi sui poropisirosa pe reco ãgua. Ahe vireco vahe imoingatupri ari ipa vahe mboyecua ãgua pëu.

⁶ Co rese peyembovihareteño peico, yepe cūritei pe reco pipe peparaisu pucu raimi tēi setá pe recoñhasa pipe peico viña.

⁷ Esepia, pe yeroyasa Tūpa rese aviye oro, ahe sãhasa tata pipe yepi. Ëgüe ehi aveira pe recocuer sãhambri tata nungar mbahe yavai vahe pipe, “¿Aviye vahe ité pñha?” hesave. Yañemosase evocoi mbahe yavai vahe upe, ahese yande yeroyasa aviye catura oro ocañi tēi vaherã sui. Ëgüe yahese, “Che rese pe yeroyasa aviye ité” ehira yande Yar yandeu. Ahese yarecora teco porañetesa iyavei imboeteipri yaicora acoi Jesucristo oyevisse curi.

⁸ Pe niha pesaisu yande Yar Jesucristo, yepe ndapesepiai viña; cūritei rumo sepiaēhi pipe peyeroya sese. Sese pereco ité pe viharetesa tuvichá, aviye catu vahe, ndapeicatui vahe ahe imombehu.

⁹ Esepia niha, pesupiti pe remiaro poropñisirosa apirēhi vahe peico pe yeroyasa pipe.

¹⁰ Aracahe suive ava Tūpa ñehe mombehusar oicua tupri pota ité co poropñisirosa resendar yuvireco ‘¿mara ehi eté pñha cō tecocuer?’ oya-pave yuvireco. Iyavei oñemoñeta yuvireco Tūpa oporoaisusa pipe pēu mbahe ombou vaherã rese.

¹¹ Cristo Espiritu senondeve oicua uca mbahe Tūpa ñehe mombehusar upe aipo ehi: “Poropñisiosar oyemombaraisu ranera, ipare rumo teco orisa porañete vahe oimera” ehi chupe aracahe. Sese, “¿Umara pñha evocoi mbia?” ehi; “¿Mbahesera vo oimera cō Espiritu remimombehu yandeu?” ehi yuvireco.

¹² Tūpa rumo omboyecua chupe, ndahei chupe

nara ité imombehupri yuvireco, pëu nara ité rumo. Ahe avei niha poropĩsirosa resendar ñehesa mombehugar omombehu pëu cūritei, Espiritu Santo pĩratasa pipe imboupri iva pendar yandeu. ¡Tũpa rembiguai avei oicua tupri pota tẽi cūritei yuvireco viña!

Tũpa yande poravo yande reco maranehi ãgua

¹³ Sese pe pĩhañemoñeta tuprisa pipe pemahe-moha tuprira peyese Tũpa porovasasa pëu ombou vaheã rese pe yeroya catu ãgua acoi Jesucristo oyevise curi.

¹⁴ Tahir iporeroya vahe pe recosa pipe ndape-icoi chira mbahe pe remimbotarai pipe, acoi pereco vahecuer peyese Tũpa recocuer cuaẽhi viteseve.

¹⁵ Peicora rumo pe reco maranehisa pipe ité. Esepia, Tũpa pe poravo oyeupe nara; ahe ndaseco marai vahe ité.

¹⁶ Supi eté icuachiapri aracahendar pipe aipo ehi imombehu: “Pe tapeico seco maranehi vahe. Esepia, che ndaseco marai vahe aico” ehi.

¹⁷ Tũpa niha opacatu ava upe secocuer rese nomboyoaviratĩ chira oporandu curi, sese pe, “Che Ru” peye vahe chupe peyembosiquiyera mbahe tẽi apoẽhi ãgua imboeteisave co ivi pipe peico vitesve.

¹⁸ Esepia, Tũpa pe pĩsiro aracahendar pe ramoi suindar aracuasa ãgũe ehi tẽi vahe sui. Peicua tupri ité niha co poropĩsirosa repri nimboepisai eté que mbahe ocañi tẽi vaheã pipe inungar oro, anise guarepochira viña.

19 Imboepisa rumo Cristo ruvi maranehi pipe. Ahe seropovēhepri, inungar ovesa nimarai vahe.

20 Ahe Tūpa oiporavo aracahe ivi, iva apoēhi viteseve ēgüe ehi vaherã. Cūritei rumo oyemboye-cua pēu mbahe tupri āgua.

21 Secocuer sui niha peroya Tūpa peico, ahe ombogüerayevi vahe omano vahe pāhu sui, ipare omondo oyemboeteisa, güeco porañetesa avei chupe. Ipipe sui peyeroya Tūpa rese iyavei pesãro co mbahe aviye vahe pisi āgua ichui.

22 Cūritei Tūpa Ñehengagüer supi tupri vahe mboyeroyasa pipe imoatirosa pe recocuer pesaisu vaherã ambuae Jesús reroyasareta. Evocoyase ēgüe peyera peyeaisu catu opacatu pe pihañemoñeta tuprisa pipe, iyavei opacatu pe pĩratasa pipe.

23 Pe niha pereco tecovesa piasu, ndahei pe yesupa omano tēi vahe suindar. Ahe rumo Tūpa Ñehengagüer supi tupri apirēhi vahe reroya pipe.

24 Esepia, icuachiapri aracahendar pipe aipo ehi:

“Opacatu ava inungar caha, iyemboeteisa evocoyase inungar ipotri.

Ipare ahe caha opa omano, ipotri avei opa oviapi;

25 Tūpa Ñehengagüer rumo apirēhi vaherã ité yepi” ehi.

Ahe co ñehesa imombehupri poropĩsirosa resendar pēu nara.

2

1 Sese peseya opacatu mbahe naporai vahe; opacatu porombopasa tēi, pe reco tupri angahu

têisa, ambuae ava mbahe pota raisa, iyavei opacatu mahechiroi resendar.

² Inungar pĩtanimi ocuacua ãgua oipota cambi; ãgüe peye aveira pe querẽhisa pipe Tũpa Ñehengagüer rese pe yembohe catu iri ãgua, peico tupri ãgua poropĩsirosa pipe,

³ que peicua itese yande Yar reco aviyesa.

Cristo inungar ita ndopai vahe

⁴ Peyemboya catu yande Yar rese. Ahe inungar ita ndopai vahe. Ava rumo ovĩroĩroño yuvĩreco. Tũpa rumo ahe ita oiporavo aviye catu vahe.

⁵ ãgüe ehira pe rereco oyeupe inungar ita ndopai vahe; ipipe sui omopuhara otũparoguã pe rese. Iyavei pahi ndaseco marai vahe nungar peicora semimbotar rupi chupe. Pe evocoyase Jesucristo rembiapo pipe sui peyapora Espĩritu upendar mbahe aviye vahe. Ahe inungar mbahe seropovẽhepri aviye vahe Tũpa upe.

⁶ Esepia, icuachiapri aracahendar pipe aipo ehi: “Che amondo ñepi ita nungar ava aviye vahe tecua Siõn ve imovĩracua ãgua.

Ahe che rembiporavo iporañete vahe, imboeteipri.

Acoi oyeroyá vahe sese, ahe nochĩ chietera ichui” ehi.

⁷ Pe seroyasar peico vahe upe evocoi ita aviye vahe ité. Seroyasarẽhi upe rumo imboaviyesa co ñehesa aipo ehi vahe:

“Oĩ aposar rumo vĩroĩroño co ita yuvĩreco.

Ahe ita rumo coiye vĩracuasa aviye catu vahe” ehi.

⁸ Iyavei omboaviye aipo ñehesa:

“Co ita oipihapi oiti uca ava” ehi. Esepia, Tūpa suindar ñehesa reroyaēhi pipe sui oyemondo uca mbahe tēi pipe yuvireco. Ēgüe ehi vaherā ité rumo ahe secocuer yuvireco.

⁹ Pe rumo ava oyesuindar nungar iporavopri peico Tūpa uve nara, imborerecuasa upendar pahī, iyavei chupendar ava seco maranehi vahe peico. Ēgüe peye Tūpa reco pĩratasa mombehu āgua peico. Esepia, ahe pe renose pĩtumimbisa nungar pe recocuerai sui tesapesa aviye vahe pipe pe reique āgua.

¹⁰ Yipindar ndahe vitei eté Tūpa upendar ava peico, cūritei rumo ahe ité peico; yipindar ndaperecoi Tūpa poroparaisuerecosa, cūritei rumo pereco ité cute.

Peico catu Tūpa mboetei āgua

¹¹ Che rivireta, che rembiaisu, peico raimi tēi vahe co ivi pipe, pepoi opacatu co ivi pipendar pe pihañemoñeta raisa sui. Esepia, pemomara uca tēi pe recocuer ipipe.

¹² Pereco tupri pe recocuer aviye vahe ava Tūpa ndoicua vitei vahe rovaque. Yepe ava remieroñro peico inungar-ra mbahe tēi aposar viña, osepiase rumo pe rembiapo catupri, omboeteira Tūpa yuvireco ahe ari pipe acoi yande Yar oporanduse opacatu ava recocuer rese curi.

¹³ Yande Yar raisusa pipe pemboyeroya opacatu pe rerecuar co ivi pipe: que mborerecuar guasu ivate catu vahe,

¹⁴ anise yivirindar. Ahe pe recua pipendar rārosar imondopri ava naporai vahe mombaraisu

ãgua, iyavei ava seco catupri vahe upe, “Aviye nde recocuer” he ãgua.

¹⁵ Esepia, Tũpa oipota pe peyapora mbahe aviye vahe ava mbahe ndoicuai vahe upe, ndayaracuai vahe upe pe rese iñehe-ñehe tẽiẽhi ãgua.

¹⁶ Peico tupri ava rovaque mbiguai tẽi nungar sui senosepri pe recosa pipe. Ndiyai rumo ipipe peyapo iri mbahe tẽi. Peico tupriira rumo Tũpa rembiguai pe recosa pipe.

¹⁷ Pemboeteira opacatu ava. Pesaisu catu pe rivireta Jesús reroyasar; pemboetei Tũpa; pemboyeroya avei mborerecuar guasu.

Yembohesa yande Yar Jesucristo mombaraisu agüer resendar

¹⁸ Pe, ava rembiguai, pemboyeroya catu pe rerecuar imboeteisa pipe que seco catupri vahe, que ndaseco põrai vahe avei.

¹⁹ Esepia, aviye catu yañemosase mbahe-mbahe tẽi ava rembiapo upe Tũpa mboyeroya tupriisa pipe.

²⁰ Mbahe tẽi aposa pipe rumo pe mombaraisuse yuvireco, ndipoi eté evocoyase ichui mbahe aviye vahe peñemosase evocoi nungar mbahe upe. Co rumo acoi mbahe tupri aposa pipe pe mombaraisuse yuvireco, ipare peñemosase chupe, ahe rumo aviye catu itera Tũpa upe.

²¹ Pe paraisu ãgua rese niha Tũpa pe poravo. Esepia, Cristo oyemombaraisu pe recocuer rese. Ahe rane êgüe ehi pe rese pe secocuer moña ãgua.

²² Ahe ndoyapoi vahe ité angaipa iyavei ndoporombopai vahe ité.

²³ Acoi ava iñehe mara-mara tẽise yuvireco chupe, nomboyevĩ eté iñehe raisa. Iyavei acoi omombaraisuse yuvireco, “Ayepira sese” ndehi eté. Ahe rumo, “Che Ru Tũpa seco ñvi vahe oicuara chupe yuvireco” ehiño oyeupe mbahe-mbahe tẽi aposar upe.

²⁴ Cristo teieté vıraso yande angaipagüer güete pipe curusu rese ‘toyepipi angaipa sui yuvireco. Ipipe sui toyuvirecoi teco ñvisave’ oyapave yandeu. Ahe niha yapichapri secoi pe recocuer moingatu ãgua.

²⁵ Esepia, pe niha yipindar inungar ovesa ocañi tẽi vahe peico viña. Cũritei rumo peyevi Cristo upe. Ahe pe recocuer osãro cũritei inungar ovesa rãrosar.

3

¿Mara ehira ava omenda vahe recocuer yuvireco?

¹⁻² Ëgüe peye aveira cuña, pemboyeroya itera pe mer. Esepia, amove ndovıroya vitei Tũpa Ñhengagüer yuvireco; pemboyecuase rumo pe reco tuprisa imboeteisa avei chupe, aviyeteramo ahe avei viroyara, yepe ndapeñehei chira chupe viña.

³ Acoi pemboyecua potase pe yemoporañetesa ndahei chira pe rete rese inungar oãca rese mbahe omoporañete ai vahe, ndahei chiaveira pe yemondesa sendi yai vahe oro nungar, que turucuar porañete catu vahe.

⁴ Iya rumo pe avıter pipe sui mbahe porañete ipocopi vahe pemboyecua pe reco mbegüemisa

iyavei pe recoasiēhisa pipe. Evocoi nungar aviye catu ité Tūpa rovaque.

⁵ Ēgüe ehi avei cuña seco catupri vahe güeco porañetesa imboyecua aracahe. Ahe oyeroya Tūpa rese yuvireco, omer avei omboyeroya yuvireco.

⁶ Inungar Sara aracahe, omboyeroya ité omer Abraham, “Che yar” ehi chupe. Pe inungar ichuindar peico peyapose mbahe aviye vahe pe siquiyeēhisa pipe.

⁷ Iyavei pe imer, pereco mbegüera pe rembireco upe. Pemboeteira sereco. Esepia, ahe nipirata tuprii, iyavei Tūpa omboura güeco tuprisa pipe tecovesa apirēhi vahe oyoya voi pēu. Ēgüe peyese, Tūpa osendu itera pe yeruresa.

Paraisusa mbahe tupri aposa rese

⁸ Iyavei na peyera pe opacatu peyese inungar ñepei oñemu vahe. Oyoya tupri mbahe tapeyandu. Peyeaisu catura Jesús reroyasar pe recosa pipe. Peyemboavara oyeupe pe reco mbegüesa pipe.

⁹ Oyapose ava que mbahe tēi pēu, anise que oñehe raise, ndapemboyevii chira chupe. Iyacatu rumo mbahe tuprisa pipe pemboyevira chupe. Evocoi nungar mbahe apo āgua niha Tūpa pe poravo ‘toipisi che porovasasa’ oyapave.

¹⁰ Esepia,

“Peipotase pe recocuer aviye tupri āgua pe yemboviharetesa pipe, pemombituhu pe ñehe raisa iyavei ndapeporombopai chira.

¹¹ Pepoi aveira mbahe tēi sui, pesecara mbahe aviye vahe.

Peseca teco tuprisa peyeupe nara, peguata supi.

12 Esepia, supi eté, yande Yar osãro ava seco catupri vahe iyavei osendu oyeupe yeruresa.

Ava mbahe tēi aposar rumo ndoipisi eté” ehi.

13 Ndipoi chira revo que ava mbahe tēi oyapo vahe pe recocuer upe yuvireco, pequerēhise mbahe aviye vahe apo.

14 Peparaisuse rumo mbahe pe rembiapo aviye vahesa rese, ¡sovasapri peico! Peyembosiquiyei rene que ava sui.

15 Pemboeteiñora rumo Cristo pe Yar secosa rese pe piha pipe. Peyemoingatu voira ava pe remiaro rese oporanduse pēu pe querēhisa pipe imombehu tupri āgua.

16 Ēgüe peyera rumo pe reco mbegüesa pipe imboeteisave. Peico tupri ra pe pihañemoñeta tupri rereco. Acoi que oñehe rai vahe pe Cristo reroyasa recocuer rese, ahe yuvinochira oñehe sui curi.

17 Tūpa oipotase pe yemombaraisu, aviye catu mbahe aviye vahe apo pipe yepi mbahe tēi apo rāgüer sui.

18 Esepia niha, Cristo teieté omano yande angaipa repirã ñepi reseve. Güeco maranehi pipe ēgüe ehi ava recocueraí rese opacatu pe reraso āgua Vu Tūpa upe. Ahe omano güete rese. Ipare rumo ocuerayevi güeco espíritu pipe.

19 Güeco espíritu pipe avei oso, omombehu Vu Tūpa remimbotar ava hã soquendapri yuvirecoi vahe upe.

20 Ahe ava Noé recosendar ndiporeroyai vahe yuvireco aracahe. Tūpa osãro güeco mbegüesa pipe secocuer moingatu āgua viña Noé oyapo viteseve

arca oico. Ahe ipipe oñepisiro ochomi tēi yuvireco amarusu sui.

²¹ Ahe i osãhangapo i poroãpiramosa, ahe omboyecua yande ipĩsiropri yande recosa. Poroãpiramosa rumo i pipe ndahei yande rete moatiro ãgua. Co rumo yaporandura Tũpa upe, yande pihãñemoñetasa moatiro ãgua. Ipipe sui evocoyase yañepisirora yande Yar Jesucristo cuerayevisa pipe.

²² Ahe oso ivave oguapi oĩ Vu acato coti. Opacatu sembiguai eta, mborerecuareta, opacatu imborerecuasa ipĩrata vahe avei ipovri pendar yuvirecoi.

4

Yandehañeco yandeyese mbahecuasa Tũpa suindar yaipisi vahe pipe

¹ Cristo oiporara mbahe rasicuer güete rese. Pe avei evocoyase peyemoingatu voi ěgüe peye vaherã peico chupe nara. Esepia, acoi ava oyemomborara vahe güete pipe oseya angaipa yuvireco.

² Ipipe sui ndoyuvireco iri chira ari rupi ava tēi pihãñemoñetasa pipe. Tũpa remimbotar rupi eté rumo oyapo pota mbahe co ivi pipe yuvirecoi vitese.

³ ěgüe peye pucu rane niha pe rembiapo ai pipe peico ava Tũpa reroyasarēhi recocuer nungar rupi tupri. Ahese mbahe-mbahe tēi peyapo pe pihãñemoñeta raisa pipe, savaiposa, pietasave pe rãse tēi pipe pe aracuasa pemocañi pe ihu tēisa pipe, pemboetei avei mbahe rahanga tēi peico.

⁴ Cũritei rumo pe mboriparer, ndoyembovihai tēi pe rese, ndapeico irise supi semimbotarai apo āgua. Ahe oñehe-ñehe tēi yuvireco pe recocuer piasu rese.

⁵ Ahe chupe rumo oimera porandusa. Esepia, yande Yar oyemoingatu opacatu ava recocuer rese oporandu āgua omano vahe upe, oicove vite vahe upe avei curi.

⁶ Sese niha co ñehesa pĩsirosa resendar imombehusa ava omano vahe upe. Yepe omano co ivi pipe inungar opacatu ambuae ava oangaipa repirã, iespĩritu rumo yuvirecoi apirēhi inungar Tũpa.

⁷ Virovi rumo ari ipa vahe oico, sese pe yapisacasa pipe pepihañemoñeta tupri iyavei peyerure catuño ité pe yeroya tuprisa pipe.

⁸ Co catu opacatu tupri ité peyeaisura pe piha pipe. Esepia, ěgũe yahera poroaisusa pipe yande ñero voira seta ava yangaipa vahe upe.

⁹ Peipisi tupri ava yuviraso vahe pe rētave; “¿Mbahe rese piha co ou?” peyei rene pe pihañemoñeta pipe pe piri ou vahe upe.

¹⁰ Ñepei-pei yande yaiporura Tũpa suindar mbahecuasa yareco vahe ambuae Jesús reroyasar rese hañeco tupri āgua. Yaiporu tupri co Tũpa porovasasa setá vahe yande cuaita mboaviye tupri āgua.

¹¹ Acoi pemombehuse Tũpa suindar mbahe, pemombehura inungar iñehe ité; acoi peporopĩtivii potase, peyapoño opĩratasa pẽu Tũpa ombou vahe pipe. Opacatu mbahe peyapo vahe peyapo ‘tomboetei ava yuvireco Tũpa yande Yar Jesucristo rembiapo pipe sui’ pe hesa pipe. Esepia, chupen-

dar ité imboeteisa iyavei imborerecuasa. Ëgüe tehi apirêhi vaherã ité.

Yembaraisusa Cristo reroyasar yande recosa pipe

¹² Che rivireta, che rembiaisu, ndapeyesapiha ucai chira, acoi oimese mbahe-mbahe tēi yande recoãhasa pēu 'ndoyavi, ndipoi chietera evocoi nungar mbahe cheu viña' pe hesa pipe.

¹³ Yayembovihareteñora rumo ipipe. Esepia, yande rereco yande Yar yembaraisu agüer nungar pipe yuvireco. Evocoiyase yayemboviharete itera acoi yande Yar oyevise güeco pīratasa pipe.

¹⁴ Iñhe marase yuvireco pēu Cristo reroyasar pe recosa rese, sovasapri peico. Esepia, Tūpa Espiritu güeco porañetesa pipe secoi eté pe rese.

¹⁵ Acoi pe pāhu pendar omombaraisuse yuvireco, ndahei chira rumo iporapichisa rese, ndahei chiaveira imondasa sui, que mbahe tēi aposa rese. Ndahei chiaveira que ambuae ava mbahe rese iñemañeco tēisa sui Ëgüe ehira serecosa.

¹⁶ Co rumo acoi peparaisuse Cristo reroyasar pe recosa pipe, ndapechĩ chietera. Pesapucaira rumo Tūpa upe imboeteisa pipe serer pereco vahe rese.

¹⁷ Esepia, oyepota ité ari Jesús reroyasar upe rane ité tecocuer rese porandu ãgua. Ëgüe ehise yandeu, mbahe tēi catu itera Jesús reroyasarēhi upe.

¹⁸ Yavaise seco catupri vahe upe iñepisiro ãgua, ¿mara ehira pīha ava ndaseco pōrai vahe ava angaipa viyar yuvirecoi vahe upe?

19 Sese peyemomborarase Tūpa remimbotar rupi, iyacatu peguataño itera mbahe aviye vahe pipe. Iyavei peyemondo itera yande Aposar upe ahe pe hã rãro água. Esepia, ahe niha yeroyasa ité secoi.

5

Aracuasa Jesús reroyasar upe

1 Che amboaracua pota pe pãhu pendar Jesús reroyasar rãrosar. Inungar avei niha che aico iyavei asepia vahe ité yande Yar mombaraisu agüer. Inungar ahe vireco teco orisa, ègüe ahe aveira acoi yande Yar oyevise curi.

2 Pesãro tupri catu Tūpa upendar ava eta pe remiaro co omondo vahe pëu inungar ovesa rese yangarecuar osãro tupri vahe ovesa; peyapora pe querêhisa pipe ité. Ahe niha Tūpa oipota, ndahei ambuae yande cuaisa pipe têi, ndahei avei guarepochi pota raisave yayapo. Yayapora rumo mboraviqui yande querêhisa pipe ité.

3 Ndapeicoi chira pe remiaro upe inungar que mborerecuar güeco ivatesa pipe oporocuai pĩrata vahe. Pemboyecuara rumo pe recocuer aviye vahe chupe imbohesa tupri pipe.

4 Evocoyase acoi oyevise yande Yar, yande rãrosar ivate catu vahe, ahese peipisira mbahe porerecosa, teco ori porañete apirêhi vahe.

5 Iyavei no pe mbia chĩhivahe, pemboyeroyara ava pe rãrosar peico. Iyavei opacatu peyemboyeroyara pe reco mbegüesa pipe peyeupe peico. Esepia,

“Tūpa ava oyeecomboivate ai vahe amotarēhimbar secoi; ava seco mbegüemi vahe upe rumo ombou oporovasasa” ehi.

⁶ Peyecomombegüe catu peico Tūpa pĩratasa povrive. Evocoyase pe reco mboivatera curi.

⁷ Opacatu mbahe rese pe pihañemoñeta atisa pemombehura Tūpa upe. Esepia, ahe pe rãrosar ité secoi.

⁸ Pearacua cañi rene peyesui, pemahemoha arı rupi peyese. Esepia, pe amotarēhimbar Carugar pe reco momara pota yepi inungar yaguar oñaro vahe oguata tēi oporoeca ‘tamomara ava’ oya-pave.

⁹ Sese peyemoviracuara Tūpa rese pe yeroyasa pipe Carugar upe. Esepia, peicua niha opacatu rupi avei yande rivireta Tūpa rese yuvirecoi vahe iparaisu co nungar mbahe pipe.

¹⁰ Peparaisumi pare rumo, Tūpa teieté pe reco mohivı tuprıra, iyavei pe reco moviracuara, pe momirata aveira pe yepepi iriēhi āgua ichui. Ahe niha oporovasasa pipe yande poravo oyeupe nara, yande yaso vaherã supı teco ori ndopai vahesave yande Yar rese yande recosa pipe.

¹¹ Ēgüe tehi tasecoi güeco pĩratasa apirēhi vahe pipe.

Mahenduhasa ipa vahe

¹² Yande rivrı Silvano omboaviye tuprı vahe ité ocuaita yepi, ahe che pĩtiviisa pipe co ayapo imondo che rembicuachía ndipucuimi vahe pe mboaracua catu āgua ‘ipipe toicua tuprı catu

yuvireco co porovasasa oipisi vahe, supi eté omboyecua vahe Tũpa poroaisusa' che hesave. ¡Peyemoviracua tupri ité sese!

¹³ Iyavei Babilonia pendar Jesús reroyasar yuvirecoi vahe oyoya vahe pe rese iporavopri, ahe ombou omahenduhasa yuvireco pẽu. Marcos, che rahir nungar avei imahenduha pe rese.

¹⁴ Peyeovaupite “avirave” apo pe yeaisusa pipe. Tapereco tecocuer tupri yande Yar Jesucristo rese peico vahe. Aipo rupive.

Tũpa Ñehengagüer
New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files
dated 29 Jan 2022

c27c2d97-c359-59f5-b367-83efb2e33739